

## 彌勒所問十念

古注經家，於此願文，亦有異解。

有云：此是上三品。此中十念，是依十法起十念。非是稱名十念。

所云依十法起十念，指彌勒所問十念。

《彌勒所問經》曰：具足如是十念，即得往生安養國土。凡有十念，何等為十？

一者、於一切眾生，常生慈心。於一切眾生，不毀其行。若毀其行，終不往生。

二者、於一切眾生，深起悲心。除殘害意。

三者、發護法心，不惜身命。於一切法，不生誹謗。

四者、於忍辱中生決定心。

五者、身心清淨，不染利養。

六者、發一切種智心，日日常念，無有廢忘。

七者、於一切眾生，起尊重心，除我慢意，謙下言說。

八者、於世談話，不生味著。

九者、近於覺意，生起種種善根因緣，遠離憤鬧散亂之心。

十者、正念觀佛，除去諸根。

《宗要》曰：如是十念，既非凡夫所能。當知初地以上菩薩，乃能具足十念。